



Edicion Special Dia di Himno y Bandera

Celebrando e aña aki 20 aña di nos Status Aparte y 30 aña di nos Himno y Bandera

E aña aki nos ta celebra e di 20 aña di nos Himno y Bandera

18 MAART 1977

E prome aña di Himno y Bandera a worde celebra un biaha mas en grande cu un manifestacion den Wilhelmina Stadion. A cuminsa cu un marcha cu a sali for di dilanti Bestuurskantoor pa dirigi su mes pa stadion. Na stadion, e tempo ey a tene un minuut di silencio pa difunto Jose Geerman, cu a contribui activamente na realizacion di e himno y bandera. Tabata tin varios orador politico y representantenan di a contribui na e realizacion di nos himno y bandera. A sigui cu presentacion di gruponan folklórico caminda e publico presente a celebra te den oranan laat di anochi den Wilhelmina Stadion.

18 MAART 1978

Na e di dos aña di celebracion a tene un home-nahe Post Mortem na e gran musico y compositor Arubano Sr. Rufo Wever. E aña ey e hoben pianista Albert Croes a toca e wals "Aruba" cu tambe ta un composicion di e compositor di himno di Aruba, Sr. Rufo Wever.

18 MAART 1979

E di tres aña di celebracion a worde celebra cu un aubade dilanti di Bestuurskantoor caminda diputado di e tempo ey John v.d. Kuyp tabata e politico cu a dirigi su mes na e publico presente.

18 MAART 1980

Centenares di mucha hunto cu nan mayornan tabata un biaha mas na e di cuater aña di celebracion di nos Himno y

Bandera. A dirigi palabra e tempo ey diputado di enseñanza Srta. Grace Bareño y Consehero General di Gobierno, Sr. Betico Croes. Anochi tabata tin un anochi cultural na e mesun sitio.

18 MAART 1981

E programa oficial pa celebracion di e prome lustro a cuminsa cu un manifestacion pa 8'or di mainta den Lago Sport Park caminda diferente school di Aruba a participa. Pa 9'or di mainta tabata tin un aubade cu hisamento di bandera door di padvindernan. Despues di e aubade tabata tin bailamento di sinta ariba e parkinglot di Bestuurskantoor. Pa 10.30 di mainta tabata tin un ofrenda floral na diferente estatua. Anochi a sigui cu un manifestacion cultural na Juancho Irausquinplein.

E anochi aki Sr. Betico Croes tambe a dirigi palabra na e publico. Aunque tabata tin un asistencia pover, e persona cu a conquista masha aplauso



e anochi aki tabata Sra. Nydia Ecury, kende tabata un di e artistanan invita.

18 MAART 1982

Na e di seis aña di celebracion tabata tin un show cultural tambe na San Nicolas, un aubade den oranan di mainta dilanti Bestuurskantoor y tambe un manifestacion cultural dilanti Juancho Irausquinplein.

18 MAART 1983

Na aña 1983 e celebracion a haya un aspecto especial despues cu Diasabra 12 di Maart e Conferencia di Mesa Rondo na Den Haag Hulanda, a conclui cu e decision cu Aruba pa mas tarda prome di Januari 1986, lo haya su Status Aparte, mientras cu diez aña despues e deseo grandi pa Aruba realiza su Independencia lo bira realidad.

E aña ey tambe a cuminsa cu peticion pa haci e dia aki un dia oficial y

cambie pa 15 di December cu e tempo ey ainda tabata un dia oficial. E celebracion e anochi ey cu a tuma lugar patras di Cas di Cultura tabata uno grandi, unda e tabata tambe impresionante, caminda hasta por a weita lagrima den algun wownan na momento di yegada di e delegacion Arubano.

18 MAART 1984

For di mainta tempran durante e aña cu ta sigui a cuminsa cu hisamento di bandera. E celebracion e aña aki tabata grandioso caminda tur mucha di school tabata na e aubade pa canta e himno di Aruba. Y anochi e celebracion a culmina ariba e pleintji patras di Cas di Cultura caminda un muchedumbre a reuni demostrando e amor pa e Himno y Bandera di Aruba.

18 MAART 1985

Mas cu cuater ora largo e celebracion di Himno y

Bandera a dura na 1985, caminda varios persona a dirigi palabra. Tabata un atardi cu anochi masha agradabel cu presentacion di gruponan di baile Simadanza y di Arubaanse Dans en Muziekschool y varios artista y grupo musical, y tambe contamento di storia door di Machi Do. E aña aki tambe e lugar di staciona auto patras di Cas di Cultura a haya e nomber oficial y Diputado Grace Bareño a devela nomber di e lugar aki cu a haya e nomber oficial Plaza Himno y Bandera.

18 MAART 1986

E aña aki 18 di Maart a bira un dia oficial y a cuminsa organiza actividadnan den diferente bario na Aruba. E aña aki tambe tabata e prome aña di celebracion di Status Aparte y e di segundo lustro di nos Himno y Bandera.

18 MAART 1987

Como un dia nacional durante e añanan cu a sigui tabata tin tambe diferente actividadnan den barionan. Y tambe sin lubida e ceremonia cultural ariba Plaza 18 di Maart. Esaki tabata combina cu yegada di mantadatorionan, presencia di Gobernador sr. Felipe Tromp, te na presentacion di bailenan folklórico.

18 MAART 1988


Diabierna 18 di Maart 1988 Aruba a celebra su 18 di Maart cu un gran cantidad di eventonan cu a ser organisa den e diferente barionan ariba e isla. E aña aki nos con-



Edicion Special Dia di Himno y Bandera

18 Maart

Celebrando e aña aki 20 aña di nos Status Aparte y 30 aña di nos Himno y Bandera



stitucion tambe a ser introduci oficialmente na Papiamentu. E promer ehemplar a worde entregá na un hoben Arubiano door di Promer Ministro Eman. Despues cu varios orador a presenta, a sigui cu música y baile te cu 12'or di anochi ariba e Plaza.

18 MAART 1989

Dia 18 di Maart 1989 tabata un fecha historico pa Aruba. Den oranan di mainta a tuma lugar ariba Plaza Libertador Betico Croes e desvelo di e estatua di Betico. Na e develo aki tabata tin discurso di Presidente di Fundacion Betico Croes, Sr. Josy Mansur, discurso di Prome Ministro sr. Nnelson Oduber y di Dr. Marco Tulio Bruno Celli, representando presidente C.A. Perez y A.D. E develo di estatua di Betico a worde efecta pa su mayornan y su yiu Gilberto J. Croes Jr. Durante henter dia tabata tin actividadnan relaciona cu e dia nacional.

18 MAART 1990

E aña aki tabata tin un celebracion grandi un biaha mas caminda tabata tin presentacion special di Doble R Super Special Stars di Curacao. E pueblo a acudi grandemente ariba Plaza Libertador caminda tin un bunita celebracion cultural.

18 MAART 1991

Ademas di e weganan popular den varios bario na Aruba, tabata tin tambe e celebracion en grande di dia nacional ariba Plaza Himno y

Bandera. Tabata tin entre otro actuacion di Papito y su Doble Sabor, declamacion di poesia, presentacion di gruponan di baile y speech di diferente personanan den nos comunidad. E aña aki nos a celebra e di tercer lustro di nos Himno y Bandera y e prome lustro di nos Status Aparte.

18 MAART 1992

Diamars anochi dia 18 di Maart 1982 e ceremonia cultural relaciona cu dia di Himno y Bandera a tuma lugar. Alto mandatarionan di Aruba incuso Gobernador mr. Olindo Koolman y Ministro Presidente Nelson Oduber tabata presente. Na e ocasion aki tambe un bunita recuerdo a worde entrega na Frere Alexius pa su bon trabao haci pa hopi aña largo na Aruba.

18 MAART 1993

E weganan popular rond di nos isla a keda e custumber ariba nos Dia di Himno y Bandera. Y mas y mas lugarnan a cuminsa tene nan actividadnan pa nan miembronan y e pueblo. E mas gusta pa bay mira ta entre otro e subimento di palo di ceba y balansamento di auto. Den oranan di mainta tambe tabata tin e celebracion ariba Plaza Libertador Betico Croes cu desfile di gruponan hubenil uniforma.

18 MAART 1994

Hunto cu e celebracionnan den bario e celebracion nacional mes na aña 1994 di dia di Himno y bandera a celebre den

Aruba Entertainment Center. Tabata tin presentacion di varios grupo musical.

18 MAART 1995

Na aña 1995 e celebracion di nos dia nacional no a tuma lugar dia 18 di Maart cu a cay ariba un Diasabra, sino a tuma lugar Diadomingo 19 y 20 di Maart. Tanto dia 19 como dia 20 tabata tin un manifestacion cultural ariba Plaza Libertador Betico Croes.

18 MAART 1996

Enconecion cu di 10 aña di Status Aparte y 20 aña di Himno y Bandera tabata tin un Santo Sacrificio di Misa ariba Plaza Betico ofreci pa Obispo Ellis. Ademas di e ceremonia bunita cu a tuma lugar ariba Plaza Libertador Betico Croes, tambe tabata tin develop na e monumento 18 di Maart.

18 MAART 1997

Loque tabata bunita pa mira na e celebracion di 18 di Maart 1997 ta e desfile di gruponan hubenil uniforma. Tambe tabata tin presentacion di e brassband D2U 365 caminda e publico a goza masha hopi mes ariba e dia nacional.

18 MAART 1998

Tanto Diamars anochi dia 17 como Diaranzon dia 18 tabata tin celebracionnan relaciona cu nos dia di Himno y Bandera. Diamars anochi a cuminsa cu e manifestacion cultural cu cantamento di himno y bandera y den presencia di varios mandatarionan. Y Diaranzon mainta cu ta e dia

nacional mes tabata tin un aubade ariba Plaza Betico cu presentacion di varios gruponan uniforma y actonan protocolario.

18 MAART 1999

Na momento cu nos pais tabata celebra su himno y bandera, a drenta waf di Aruba e "cutter" di guarda costa, "Panther". Na Plaza Betico tabata tin e tradicional desfile di gruponan hubenil y na diferente school y den barionan tabata tin cantamento y weganan popular.

18 MAART 2000

Henter e publico ariba Plaza Libertador Betico Croes a lanta para na momento cu e grupo di hobennan di Briyo di Solo y Centro Man na Obra a haci nan presentacion na e celebracion di 18 di Maart. Ademas di e bunita presentacion aki tabata tin tambe entre otro presentacion di Trio Huasteca, e hoben Biran Vieira, presentacion di alumnonan di school di musica y harpa y hopi mas cu a haci e celebracion aki un biaha mas uno grandi.

18 MAART 2001

Manera tur e añanan anterior e celebracion di gobierno a tuma lugar ariba Plaza Libertador Betico Croes. Gruponan uniforma tabata e centro di atencion di e manifestacion cultural aki caminda nan ta duna homenahe na nos bandera. Y e anochi prome dia 17 di Maart tabata tin e inicio di e celebracion cultural cu homenahe na Aruba pa grupo Portuguez "Grupo Folklorico Primaera" y a termina cu un bunita fuego artificial.

18 MAART 2002

E dia nacional un biaha mas a worde celebra grandemente tur caminda. E aña aki e celebracion nacional a cay ariba un Dialuna caminda for di tempran hopi hende tabata ariba pia, pa asina presencia e actonan protocolario ariba Plaza Libertador Betico Croes. Diferente dignatario a hiba palabra, como tambe

a recorda e nificacion y importancia di nos Himno y Bandera. Despues a sigui cu e tradicional desfile cu aña pa aña ta bira mas grandi.

18 MAART 2003

Y manera ya a bira e custumber e pueblo ta acudi fielmente na nos manifestacion cultural ariba Plaza Libertador Betico Croes pa asina inicia e celebracion di Himno y Bandera. Despues di e ceremonianan protocolario e pueblo ta bishita diferente lugarnan den bario caminda tin hopi actividad relaciona cu e dia nacional aki. Durante e manifestacionnan ariba Plaza Libertador Betico Croes cu a bira asina popular, a cuminsa bini tambe cu presentacionnan di autonan clasico, gruponan di harley etc.

18 MAART 2004

Pa mas o menos 10'or di mainta tabata tin entrada di e bandera di Aruba ariba Plaza Libertador Betico Croes caminda den presencia di e dignatarijonan presente el a worde hiza pa padvinder nan y asina tambe a canta nos dushi himno di Aruba pa asina oficialmente habri e dia di celebracion nacional aki. A sigui cu diferente discurso di nos mandatarionan y tambe cantamento di e coro bao direccion di Maybeline Arends Croes. Y no por kita afor cu durante henter dia tabata tin celebracionnan rond Aruba cu a termina te den oranan laat di anochi.

18 MAART 2005

Gruponan di scout, departamentonan gubernamental, gruponan comunitario, gruponan di baile, equiponan di Lifida, autonan clasico y mucho mas tabata forma parti di un colorido manifestacion pa asina rindi homenahe na nos Himno y Bandera. Di esun di mas chiquito te na esun di mas grandi a sa di goza di e dia nacional aki y caminda grandemente nan a sa di rindi honor na nos Himno y Bandera.